

समां - 12:25 hrs.

<><><><><><>

HM –JK Security

केन्द्री गृहमंत्री अमित शाह होर अज्ज नमीं दिल्ली च इक उच्चि सतह दी बैठक दी अध्यक्षता करा रदे न जेहदे च जम्मू-कश्मीर दे मजूदा हालात दी समीक्षा कीती जाहगा। बैठक दा मकसद बक्ख-बक्ख सुरक्षा एजेंसियों बशकार तालमेल बधाना ते केन्द्र शासत प्रदेश च जारी आतंकवादरोधी कारवाइयें दी समीक्षा करना ऐ। बैठका च जम्मू-कश्मीर दे उपराज्यपाल मनोज सिन्हा हुंदे इलावा गृह मंत्रालय, खूफिया ब्यूरो, फौज, CRPF, BSF ते जम्मू-कश्मीर पुलस दे बड्डे अधिकारी बी इस च हिस्सा लै रदे न। जम्मू-कश्मीर थमां मुख सचिव ते होर केई उच्च अधिकारी कल शामी गै राजधानी दिल्ली पुज्जी गेदे न। अमित शाह होर मेद ऐ जे जम्मू-कश्मीर च रमानदारी ते स्थिरता बनाई रखने लेई बक्ख-बक्ख एजेंसियों बशकार तालमेल ते सहयोग गी निगर बनाने पर जोर देगंन।

<><><><><><>

Dy. CM -I&C Review

उपमुखमंत्री सुरिन्दर चौधरी होरें कल उद्योग दे बपार मैहकमा कश्मीर दे कम्मे-कारकरदियें ते उपलब्धियें दा जायजा लैने लेई सद्दी गेदी इक बैठक दी अध्यक्षता करदे होई आखेया ऐ जे सरकार आसेया शुरु कीती गेदियें स्कीमें दा लाह पुजाने लेई हर इक मामले गी संजीदगी ते पूरी शिद्दत कन्नै लैदे होई एहदे पर कारवाई कीती जा तां जे हर लाभार्थी गी इनें स्कीमें दा पूरा-पूरा लाह विजन चिर लगगे तौले ते समें-सिर पुज्जना यकीनी बनी सकै। उपमुखमंत्री होरें उद्योग ते बपार मैहकमे दे उद्योगिक ते ढांचागत परियोजनाएं दी रफ्तार, प्रगति ते स्थिति दा बी तफसीली जायजा लैता ते आखेया जे इंदी अमलावरी पूरी चाली पारदर्शी ते असरदार ढंगै सिर तोड़ चाढ़नी लोड़चदी। ओ सरबन्धित अफसरें ते प्राधिकरणें गी आखेया जे ओ इनें परियोजनाएं गी मित्थे गेदे समें दे अंदर-अंदर तोड़ चाढ़ना यकीनी बनाने दे कन्नो-कन्नी, निवेशकें लेई साजगार माहौल तयार करने, स्टार्ट-अप उद्यमियें गी समर्थन देने ते बेहतर बपारिक ते उद्योगिक विकास लेई असरदार नीतियां तयार करने पर बी चेचे तौरा पर ध्यान देन।

<><><><><><>

Dar SARAS Mela

ग्रामीण विकास ते पंचैती राजमंत्री जावेद अहमद डार होरें कल श्रीनगर दे शेरे-कश्मीर पार्क च “सरस” मेले दा उदघाटन कीता जेहदे च मुख्य भरै थमां ग्रामीण महिलाएं, आप-सहायता समूहें आसेया तयार कीते गेदे दस्तकारी दे शानदार नमूने रखे गेदे न। इस मौके बोलदे होई डार होरें आखेया जे “सरस” मेला ग्रामीण महिलां उद्यमियें गी अपनी क्षमता ते हुनर दा राष्ट्रीय स्तर पर प्रदर्शन करने दा मौका उपलब्ध करा रदे न, जेहदे नै उन्दे उत्पादें दी दूर-दूरै तगर ते मते लोकें तगर पुज्ज यकीनी बनी सकै।



Sakeena Requirements

सेहत ते मैडिकल शिक्षा मंत्री स्कीना इतू होरें कल सेहत ते मैडिकल शिक्षा, समाज कल्याण ते शिक्षा विभागें च चलै करदी भर्थी प्रक्रिया दा जायजा लैता ते आखेया जे इस कम्मै गी जमीनी सतह पर सेवाएं गी बेहतर ढंगे सिर पुजाना यकीनी बनाने लेई एहदी रफ्तार च तेजी आंदी जा। जम्मू-कश्मीर सेवा ताल बोर्ड दे सीनियर अफसरें कन्नै इक जायजा बैठक दी अध्यक्षता करदे होई स्कीना इतू होरें प्रमुख सार्वजनिक सेवा क्षेत्रें दे सशक्तिकरण दी जरूरत पर जोर पाया- टकोहदा करियै सेहत क्षेत्र च, जेहदा समाज च इक बड्डा गै महत्वपूर्ण रोल ऐ। उनें खाली पेदियें असामियें गी पुर करने च चिर लगगने पर चिंता प्रगट करदे होई निर्देश जारी कीता जे भर्थी प्रक्रिया गी समें-सिर पूरा करने च औने आहलियें दिक्कतें-रुकावटें गी जिन्ना तौले होई सकै दूर कीता जा।



Satish -IMC

सूचना ते टैक्नोलोजी मंत्री सतीश शर्मा होरें आखेया ऐ जे जम्मू-कश्मीर च इक नमें डिजिटल दौर दी शुरुआत होआ करदी ऐ जित्थे टैक्नोलोजी हर इक नागरिक गी सशक्त बना करदी ऐ, शासनिक कम्में च बड्डा बदलाव आहन्ना करदी ऐ ते डिजिटल भविष्य गी सुरक्षित करै करदी ऐ। मंत्री होर केन्द्री सूचना प्रौद्योगिकी मंत्री ज्योतिरादित्य सिंधिया हुंदे आसेया उदघाटन कीती गेदी सब्भनें प्रदेशें दे सूचना प्रौद्योगिकी मंत्रियें दी गोलमेज कांफ्रेंस ते इंडिया मोबाईल कांफ्रेंस दौरान बोला रदे हे। सतीश शर्मा होरें आखेया जे सरकार दियां जारी पैहलकदमियां छड़ियां दूरसंचार ढाचें च गै विस्तार ते बाद्दा गै नेही करारदियां सगुआं जम्मू-कश्मीर गी समावेशी, इक-दुए कन्नै जुडे दा ते सुरक्षत बी बना करदियां न। संशोधन कीते गेदे भारत –नेट प्रोजैक्ट तैहत कीते गेदे बदलावें गी उजागर करदे होई मंत्री होरें दस्सेया जे जम्मू-कश्मीर दे 2 ज्हार 574 गाएं ते 4 ज्हार गां पंचैतें गी जोड़ने लेई मती रफ्तार आहलियां आप्टिकल केबल बछाई जा रदी ऐ।



Dir Tourism –Paragliding

सैलसफा जम्मू दे निदेशक डाक्टर विकास गुप्ता होरें कल जम्मू कश एथम थाहर पैराग्लाइडिंग पायलटें दे 6एं दिने दे इक सिखलाई कोर्स दा उदघाटन कीता। एह सिखलाई कार्यक्रम अटल बिहारी वाजपेई इंस्टीच्यूट ऑफ माउटेनरिंग मनाली हिमाचल प्रदेश दे दंडू माहिरें दी दिक्ख-रिक्ख तैहत आयोजित कीता जा रदा ऐ। इस सिखलाई कार्यक्रम दा मकसद मकामी नोजवानें गी पैराग्लाइडिंग करोआने लेई तयार करना ऐ तां जे अगगे चलियै ओ बतौर इक पैराग्लाइडिंग पायलेट कम्म करी सकन। फिलहाल एह कैम्प 17 अक्तूबर 2025 थमां हिमाचल प्रदेश दी बीर बिल्डिंग थाहर लगने आहले पी-4 ट्रेनिंग प्रोग्राम च शामिल होने कोला पैहले दी तयारी कराने लेई लोआया गेदा ऐ। इस मौके सैलसफा निदेशक होरें आखेया जे मैहकमा जम्मू प्रांत गी साहसिक सैलसफा लेई तयार करने गितै अनथक जतन करै करदे न।

